



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8

Assam Health Minister-i 'Beyond COVID - New Normal for Urban Population' sayaogo

North Korea nung chiyongtsü agi anünger



VOL. XVIII NO. 244 (ADOK 244) DIMAPUR

ROGONÜ (FRIDAY)

AAMI (JUNE) 18, 2021

₹ 5.00

State ajunga June 30 tashi maneni mokdanga ayutsü

Dimapur, Aami/June 17 (TYO): State sorkar sangdong ka ajanga, June 16 nü COVID-19, High Powered Committee senden nung state tena asadanga sülen COVID-19 tashidak menar ano tajemba mekümi state kübok district ajak nung shiranger shilem 5 tema aliba asateta, COVID-19 tashidak menatepa aoba nokdangtsü atema jenjang tapet agitsü nungdakba asatetogo, ta metetdaksü.

Health & Family Welfare Department aser Districts Task Force tem nungi shisatsü agiba sülen Chief Secretary, J. Alam-i, Disaster Management Act. 2005, Section 22 (2) (b) aser section 22 (2) (h) dak ajemdaker state ajunga maneni June 19 nungi 30 tashi mokdanga ayutsü tetuyuba agütsüogo.

June 19 nü amentsü aliba CCNPI senden thinener

Kohima, Aami/June 17 (TYO): June 19 nü Chumukedima, Dimapur nung Core Committee on Naga Political Issue (CCNPI) senden mezüngbuba amentsü lateter aliba thinenogo.

CCNPI Member Secretary aser Minister Neiba Kronu-i sangdong ka ajanga, state mokdanga aliba atsülangshiba ajanga senden athitsüsa aküm, ta ashi. Senden amentsü atema anogo ano tang tashi melateti lir, ta paisa ashi.

Tang tetuyuba balala agütsür aliba den ano tetuyuba kar bendenloktüsügo. Tetuyuba tem yamai alitsü:

a. State kübok tesem ajak nung anogoshia nikongtsütsü 4 ako nungi anepdang 5 ako tashi gari aser nüburtem senzusenpongtsü khenyongi memelatsü. Ajüsüaka jongdakba maparen atema aser senzusenpongtsü atema temelaba agütsür alirtem iba talenba küboki maitsü.

b. District Task Force-i Covid-19 tashidak menatepa aoba nokdangtsü asoshi tenokdanga talila kar agütsütsü nungdaker ta bilemra, pei tawabanga kübok aliba tesemtem apir tetuyuba talila agütsütsü akok.

Kasa mapang nung Kronu-isa, NPF-i Core Committee on NPI nung MLA Dr Chumben Murry melena MLA Muthingyuba Sangtam shimba metetdaksüogo. CCNPI nung züngsem 16 lir kong NDPP, BJP & NPF nungi züngsem pongungu aser Independent candidate ka lir shirnok Nagaland nung MP ana aser state assembly nung züngsem 60 densema züngsem 62 agi kümtetba Parliamentary Committee nung shilem ka lir.

Nagaland nung COVID-19 agi meneper nisung 24,000 jungogo

Kohima, Aami/June 17 (TYO): Nagaland nung anogo 12 buba atonga COVID-19 tashidak tasen putetba dang nungi iba tashidak nungi taneptsü angur timba arur. Brehostibarnü nisung tasen 74 dak COVID-19 positive jangjatetaka nisung 398 taneptsü nua liasü.

"Tanü COVID-19 positive cases 76 putetba ya Kohima nung 29, Dimapur nung 14, Peren nung 11, Mokokchung nung 9, Tuensang nung pezü, Phek nung asem. Kiphire aser Mon nung ana-na aser Wokha o Zunheboto nung ka-ka alitsü," ta State Nodal Officer for Integrated Disease Surveillance Project Dr Nyanthung Kikon-i anogoshi COVID-19 osang sangdongba nung shia liasü.

State nung tang tashinung COVID-19 agi meneper nisung 24,041 jungogo, ta pai ashi.

Taoba mapang coronavirus positive puteta alir nisung 398 - Dimapur nung 233, Kohima nung 55, Tuensang nung 41, Mokokchung nung 29, Zunheboto nung 25, Wokha nung 6, Phek nung pongu, Longleng nung asem aser Peren nung ka -

kasa anogo taneptsü nua tang iba tashidak nungi taneptsü angur ajak agi nisung 20,525 alitsü, ta pai ashi.

Iba yongji Bodhbarnü taneptsü anguba shilem 83.98 aliba nungi shilem 85.38 kumogo, koba May 30 nü shilem 71.98 nung liasü.

Tang active cases 2,368 ya caseload indang shilem 9.85 alitsü, ta pai ashi.

Item active cases rongnung nisung 119 dak temang nung timtem sümia lir, nisung 51 dak tera ajiteter aser oxygen nung lir, nisung 19 kanga sashia kangshia oxygen nung lir, nisung 17 ICU nung ventilator inoker kanga mejungi kangshir aser asem ventilator nung lir. Nisung 2,159 dak iba tashidak putetaka temang nung timtem agütsüba kecha mali, ta pai ashi.

COVID-19 positive alir nisung asem Kohima nung asüba, Kiphire aser Mokokchung district shia kaka asüba ajanga state nung COVID-19 keter asür ajak senteper nisung 466 kumogo, aser item rongnung nisung 14 bo danga tashidak agi asüba alitsü, ta Dr Kikon-i ashi.

Ajak senteper COVID-19 agi shiranger nisung 682 tashi danga state temi anir ogo, ta ashi.

Tang tashinung COVID-19 tashidak alitsü temolung melemteti sample 2,12,164 tendangogo. Itemji RT-PCR nung 94,910, TrueNat nung 59,292 aser Rapid Antigen nung 57,962 alitsü, ta paisa ashi.

Nagaland nung Bodhbarnü tashinung nisung 3,25,313 nem COVID-19 mozü 3,80,271 agütsüogo, ta State Immunization Officer Dr Ritu Thurr-i ashi.

State nung COVID-19 mozü agütsür alir rongnung frontline worker 59,743, healthcare nung inyaker 15,731, arishi küm 45 nung tema nisung 1,35,088 aser arishi küm 18 nungi 44 tsüngta alir nisung 1,14,751 alitsü, ta pai ashi.

Nisung 54,958 nem dose tanabuba agüja parnokbo COVID-19 vaccine course ajunga tembanga agiogo. Item rongnung frontline worker nisung 28,217 alitsü, healthcare nung inyaker nisung 10,310 aser arishi küm 45 nungi tema nisung 16,431 alitsü, ta Dr Thurr-isa metetdaksü.

Dimapur nung Ao Arogotem aser lokti tentetemi maneni yarir



Dimapur, June 17 (TYO) : Asen lima asoshi Dimapur ya kanga tongtibang tesem ka asünungji, iba yimti nungi tashidak prokshia moudaktsüi nokdangtsü tangatetba nung, Dimapur district ajaklen Dimapur Area Ao Baptist Churches & Ao Civil Societies Co-Ordination Committee on

Covid-19 teloki taoba küm nungi tenzüka tang tashi Covid tongpang nung maneni meranga raradagi aser tanüa parnoki "non medical frontliners" meyirijang dak tali ajurua sarasadem mapang agiogo.

Tanü parnoki ajuruba 'non medical frontliners' rongnungji

Dimapur Municipal kübok inyaker yimti yimdong aokertem, electric department nung field staff-tem aser tesem balala nung mita nokdaker mitkartem aser tepoukba ki anükertem liasü. Tanep nungi nikongdang tashi parnoki item inyakerntemji ajurua sarasademtsüba mapang parnok

den tajemtsü tzü den chiyongtsü kar lemsatetpa liasü.

Iba Committee yagi taoba ita nungi tenzüka tang tashi nung Dimapur district nung aliba Covid Hospital tenet den Covid Care Center aser CMO office nung inyakerntem nem pezünü chiyongtsü agütsüogo aser tanü

agi tanabenbuba non medical frontliner-tema ajurua sarasadem mapang agir.

Iba committee-i inyakba dang masü saka Dimapur ditric nung aliba Ao arogotem aser lokti tentettem aser kija kibong aikati tenla tulu agüja Covid tongpang nung nokdakdagi.

ASENOK MOZÜ KITEM ASER YANGJI TEYARI ANGÜTSÜBATEM METETDI (SHILEM-I1)

Primary Health Centre: Tesem ka nung Primary Health Centre (PHC) lapoka aliba mozü kidangji shiranger amongtsü atema yipten 6 alitsü. Ibai nüburtem asoshi medical doctor ajurutsüba mezüng tesem asütsü. PHC shia nung MBBS doctor ka den, staff nurse asem, pharmacist ka aser Lab Technician ka tabosa alitsü. Iba kübok sub center trok alitsü, anungji item sub center-tem nungi yokba shirangertem repringtsü aser yangji makokba tashi ano anasatiba nung aliba Community Health Center mesüra tanga temaba mozü ki bushia yoktsüa akok. IPHS ajanga latettsüba agi, PHC mozü kidang inyakerntem hopta nung anogo trok, anogo shia shirangertem rongnung pei kidang nungi arurtem (OPD), anepdang ghonda 4 aser nikongdang ghonda 2 , ajak agi ghonda trok repringa anepalutsü. Anogo nung doctor kati nisung 40 bosa repringtsüla ta IPHS-i latetja lir.

Ajungben lendong tsüdong ataloker yiruyiponger arurtem anepalua zübo amtsüba, zübo arütsüba aser tangaleni meyokdang anepaluba, azüi angoba, peri mechiba aser jepjai metepba aser iba ama ajungben lendong nung timtemer anepaluba mapatemji anogo nung ghonda 24 mozü kidang inyaker nurse-temi repringtsü. Ajüsüaka, nungdaka jara , yangji aliba docor (Medical Officer)-a arua yariteptsü. Iba mozü kidang shiranger mongdakja anepalutsü aser PHC nung anepalu mesütettsüba purtem tanga mozü ki tuluba bushia yoktsü.

Tang tashi nung Nagaland nung PHC 33 lir. (<http://164.100.24.220/loksabhaquestions/annes/173/AU2636.pdf> nung angutsü.)

Community Health Centre : Nüborntem asoshi mezüng Specialist doctor-tem ajurudak mozü kiji Community Health Center (CHC) ya lir. CHC mozü kidang yipten 30 alitsü aser idakjisa Operation agiba takdang ka (OT), X-ray, tanur asoba takdang aser Laboratory takdangtem alitsü. CHC mozü ki ka nung shirangertem yaritsü asoshi Medical Specialist 4 alitsü, itemji operation agitsü atema Surgeon ka, temang nung tashidak repringtsü atema Physician ka, tetsür atema Gynecologist ka aser tanurtem atema Padiatrician ka aser parnok den yariteptsü asoshi paramedical aser tanga staff-tem alitsü. CHC mozü ki ka kübok PHC 4 alir, anungji item nungi yokba shirangertem yariba den ano tetsür temang mazüngertem asoshi Gynecologist aliba agi teyari tajung agütsütetter. Iba mozü kidang ya tebo aser Ayush doctor-tema alitsü.

National Health Mission (NHM) sentong nung tongtibang kaji government mozü kitem nung ketdangser doctor-temi pei inyakba mozü kidang nungdak repringteta parnoktsa inyaksü atema küm shia sen terara lemzüksür. Iba dangji Untied Grant/ Untied Funds ta ajar. Iba Untied Grant ajang küm nung Subcenter mesüra Health & Wellness Center (HWC) atema sen Rs.20,000 nungi 50,000 tashi agütsür; PHC nem sen Rs.1.75 lakh agütsür; CHC nem sen Rs.5 lakh agütsür aser District Hospital nem sen lakh 10 agütsür. Iba sen jagi mozü kidang parnoki kiojen yanglushitsüa akok aser mozü kidang nungdakba osettem light bulb aser inverter ama alitsüa akok. Iba sen nung jagi shirangertem nungdakbatema alitsütsüa akok.

[Iba osang ya Wt.Limatula Yaden, shiba DGHRD, Central Board of Indirect Taxes & Customs , New Delhi nung tang Additional Director General lir aser taoba küm 6 tashi Ministry of Health & Family Welfare, Govt. of India nung NHM Policy Director liasü, lai yokba nungi nüborntem ajangzüksü asoshi adoktsür.]



June 17, 2021 nü Dimapur Ao Lanur Telongjem Nagarjan Unit-i kiyong nung nungdakba kibongtem nem jang lema aotsü mapang tangokba yangi noksa nung angur.

Kohima DC-i lockdown atsülangshiba metetdaksü

Dimapur, Aami/June 17 (TYO): Deputy Commissioner, Kohima, Gregory Thejawelie-i June 17 nü sangdong ka ajanga, Kohima district nung tang tenokdangba balala agütsür alibatem maneni June 30 nü tashi benoka atatsü ta metetdaksüogo. Tang agütsür aliba tetuyuba den bendenloksema ano tetuyuba talila kar benokba paisa, metetdaksüogo.

Tetuyubatem:

- Dokan lapoktsü atema temelaba agütsür aliba tem Hombar, Mongolbarn, Brehostibar aser Hokolbarnü anepdang 6

- Item business establishment aser private establishment indang kiburtemi pei establishments temeket nung COVID-19 SOP tem benoka inyaksangshitsü atema khuret abentsü.
- District nung June 19 nü nungi tenzüka June 30 nü tashi anogoshia nikongtsütsü 2 ako nungi anepdang 5 ako tashi gari aser nüburttem senzüsenpongsü memelatsü. Ajisüaka jongdakba maparen atema

ako nungi nikongtsütsü 2 ako tashi lapoktsü melatsü. aser senzügenpongsü atema temelaba agütsür alirtem iba talenba küboki maittsü.

Applications/queries tem a j a k warroomkohima@gmail.com dangi mail sütettsü mesera Helpline Nos. 6033833879/9362705742 dangi call süa teyari agitettsü.

Tetuyuba sülen manidakertem ajak Indian Penal Code Section 188 aser Disaster Management Act, 2005 kübok section balala dak ajemdaker tapet temerenshi agütsütsü, ta DC-isa metetdaksü.

Tuensang nem medical oset tenla agütsü

Dimapur, Aami/June 17 (TYO): Delhi aser Bangalore nung amenoka aliba Chang Baptist Lashong Thangyen (CBLT) nungi temolunger temi medical osettem agütsüba June 17, 2021 nü CBLT Office, Tuensang nung agizüka liasü.

Item oset ya shilem 70 shi BSL-II Lab, Tuensang nem agütsü aser tanüingba oset ya PHC kar nem agütsütsü lemzüksü. Iba sentong nung

Deputy Commissioner aser Chairman, District Task Force for COVID-19, Kumar Ramnikant IAS aser BSL Lab nungi CMO, MS, scientist aser doctor tem aser CBLT nungi ketdangsurtem dena liasü.

Pei atema mebilemi dangar atema bilemja tenlaba aser CBLT ajanga maparen balala animesor inyakba asoshi Deputy Commissioner, Kumar Ramnikant-i pelaba lemsatepa liasü.

Timtem ajuruba ajanga meimchir arok atema ka kuma lungjemdaksü aser tajunglen alima ajunga ya yimtsung ka ama kumdaksüogo, ta Deputy Commissioner-i ashi.

Item medical oset nungya N-95 mask 2000, 3 layer surgical mask 3000, head cover 2000, Biomedical waste bag 1000, Nitrile gloves 3000, shoe cover 3000, surgical glove 2000, PPE 20 aser Face Shield 300 alitsü.

DC Peren-i aayanger atema teyari agütsüba sentong tenzüksü

Dimapur, Aami/June 17 (TYO): Anogoshi aayangi aor nem jang-o-tzü teyari agütsüba sentong ka St. Xavier College, Auditorium Hall, Jalukie nung ADC Jalukie, NZPO tir, Ward Union aser Principal, St. Xavier College nungertem lia Deputy Commissioner, Peren,

Sentiwapang-i June 17, 2021 nü tenzüksü liasü.

Item teyari oset ya District Management Authority, Peren aser District Administration lungjemer anepalua agütsüba lir.

Iba sentong nung Deputy Commissioner-i o tatsüka jembiba mapang St. Xavier

College Principal ajanga tashidak wara agi tesen ajunga sünger lia maneni yariba atema pelaba lemsatepa liasü.

Iba sentong nung EAC Peren, Ehoilung menden liasü aser teyari osettem ya Kenjanglwa Baptist Church, Youth Department ajanga anepalua sepja liasü.



Health & Family Welfare Department aser DAY- NSRLM Mokochung lungjemer June 17, 2021 nü Mangkolemba Block kübok Longjemdang yimdak arishi küm 18 nung tema temsüa alir ajak atema COVID-19 Vaccination drive ka ayongzüka agiba noksa abelen angur. Kasa anogo Health & Family Welfare Department aser DAY- NSRLM Mokochung lungjemer Ongpangkong North Block kübok Moalenden yimdak küm 18 nung tema temsüa alir ajak atema COVID-19 Vaccination drive ka ayongzüka agiba noksa achichilen angur.

YBPK-i ken o jangjashitsü

Dimapur, Aami/June 17 (TYO): June 15 nü Ministers' Hill Baptist Higher Secondary School (MHBSS), Kohima nung auyaba ken o nung aija alir ka Kohima Police-i puogo, ta social media aser osang kaket sendakba nung Yachem Böhü Pangthai Kohima-i ken o jangjashitsüogo.

Osang nungsa aija alisang ket nungi sen 1,52,390 ngutetba metetdaksüogo aser aija alisang ya Paira colony, Burma Camp, Dimapur nung alir, Longleng kübok Yachem yimtsung nungi Akangba Phom'er jabaso Daniel Phom (22) ta sangdonga liasü.

Ken o maneni bushitsüngdangtsü atema South

Police Station nung ken o ka benokogo.

Iba dak sendakba nung Yachem Böhü Pangthai Kohima-i ken o jangjashija, aija alisang ya Yachem yimtsung nungi masü aser pa Phom nungera masü ta shiogo. Anungji Yachem nunger aser Phom nungertemi aija alisang ya Yachem aser Phom nunger ta magizüker, ta YBPK-isa metetdaksü.

Kasa mapang nung YBPK-i, ozüing alema Yachem nunger senso jenjang amshiba aitsüogo aser Yachem nunger masürtemi Yachem yimtsung tenung menüksütsü merangra sobaliba temzüing ozüing kübok tapet temerenshi agütsütsü ta amokmerenogo.

NPP Nagaland-i asükhulemsatep

Dimapur, Aami/June 17 (TYO): NPP Nagaland-i sangdong ka ajanga, Lhomithi Yephthomi'er (ex MLA) jabaso tambusang Akuto Yephthomi asüba osang angazüka mang ayimba lemsatepogo.

Pa asüba ya Sumi nunger atema aser asen lokti atema takoksa tulu lir. Sempet aketba lenir tajung ka süogo, shiba parnok züngartem rongnung shishilembar tajungtiba ka liasü. Iba takoksa ya tepang agi rasaa ashitsü makoker, ajisüaka pa tatem maka anisüngzüka alitsü

ta amanger. Pa pilaa oaka pa mapa tajung teti tatem maka alitsü aser menungra bilemtettsü, ta NPP tir Dr. Andrew Ahoto Sema-i ashi.

Maneni mangyim jashi nung aliba mapang asür kibong den NPP-i asükhulemsateper aser mangyim jashi khuret koktettsü atema Tsüingrem taochi parnok dak mongdakjang ta sarasademtsüba den asür tanüla teti tatem makdak anisüngzükdangjang ta sarasademtsüba, tir Ahoto Sema-i lemsatepogo.

Longleng aser Tamlu nung teyari agütsü



DC Longleng, M.Shayung Phom-i teyari agütsüba yangi noksa nung angur.

Dimapur, Aami/June 17 (TYO): District Task Force Longleng ajanga Tamlu aser Longleng nung anogoshi aayangi aor nem June 16, 2021 aser June 17, 2021 anogotem nung teyari jang-o-tzü lema agüja liasü.

Longleng nung iba teyari agütsüba maparen ya Public Ground nung Deputy

Commissioner & Chairman, District Task Force for COVID-19, M.Shayung Phom lia inyak aser Tamlu nung iba maparen ya ADC Office Complex nung ADC Tamlu, Temjensangla lia inyaka liasü.

Iba teyari agütsüba mapang anogoshi aayangi aor nisung 1,150 tenung zülüoka liasü.

14 IRB, Kiphire nung Assam Rifle pur firing practice alitsü

Dimapur, Aami/June 17 (TYO): Deputy Commissioner, Kiphire ajanga Kiphire yimtsung aser Okhezung yimtsung nung alirtem dang sangdong ka nung, 7 Assam Rifle troops, Kiphire pur June 18, June 22, June 25, June 29 aser July 2, July 6, July 9, July 13 aser July 16, 2021 anogotem nung 14 IRB, Kiphire indang firing

range nung firing practice alitsü, ta metetdaksü.

Iba dak sendakba nung awareness tali agütsüba sentong ka June 17, 2021 nü agia liasü.

Iba firing range anasa aliba yimtsungtem nungi nüburttem dang iba tesemi maotsü metetdaksüogo. Iba sangdong nung aibelener tem dang tasüngdangba alitsü, ta sangdong ajangasa ashi.



MULUNGNEN O

Er. I. Menangnoksüng (Chungtia)

Retd. Engineer-in-Chief, NPWD

18 December 1939 – 13 June 2021.

"Khrista ajanga ni ajak inyaksü akok, shibai ni tashi itdaksür."

- Filipi 4:13

Ozü temeim kinungbo, obala aser oboula, kibong nung tebedi, I. Menangnoksüng tesü nep nung iba lima nungi pilaa aoba osang kanga dang jashiseta sangdonger. Pa dak aketba ajemalu, tamang aser pei dang nungi pi taoba ta bilemba temeim shisatsütemji onok asoshi pai toktsür aoba senmang tajungtem asütsü.

Onok timtem aser mangyim jashi mapang maneni onok dang meima teyari tajung agüja yaritepertem, kija-kibong, tembar-medemertem, arogo aser lokti tentet balala nungi temeimertem ajak dang onoki kanga pelaba metetdaksür. Nenok sarasadem, temeim aser teyaritep mapatem ajanga onok mulung anisüngzük aser tashi tasen anguba tepela nenok ajak nem metetdaksüner.

Onok mulungjang nung teti pa alitsü aser onok rongnung pa taküm otsü lemsatepba ajanga teti pa bilemtetsü.

-Temeim kinungtsü aser kinungertem.

Assam, Arunachal Police-i NDFB training camp ka raksatsü

Guwahati, Aami/June 17 (Agencies): Assam aser Arunachal Pradesh Police Forces na longjemer tenokdangba agütsür aliba National Liberation Front of Bodoland (NDFB) telok indang training agiba camp ka raksatsüogo.

NDFB camp ya Assam den arrtsü nung Arunachal Pradesh, Pakke-Kessang district kübok arem min ka nung amenoker liasü.

Assam aser Arunachal Pradesh Police indang commando 300 dak temai iba meita aoba sentong nung shilem agia liasü.

"Timer operators" ama NDFB telungpurtemi züngsem tasentem nem training agüja liasü asütsü ta temulung meleme bilemer.

"Camp ya tawa yangluba lir aser item nisungtem ya sung tsüngda ayokba maparen nung sodaka liasü asütsü," ta Arunachal Pradesh Police-i ashi.

Ajisüaka telungpurtem ka danga meputet.

"Police tem aruba ngua parnok jenshia ao asütsü," ta police-i ashi.

Temetetsükaji iba tesem nung sung agi yangluba hadirtem ngutetogo aser iba ajanga iba tesem ya training camp ama amshia liasü, ta jangjatsür.

"Süng agi yangluba hadirtem ya yimya agi training mapang amshir, anungji iba camp nung training agitsü atema sentong yanglua liasü asü masü ta tasüngdangba adoker," ta kasa sangdong ajanga metetaksü.

"Tarutsü nunga telungpurtem, lokti anema inyakerter aser ozüing alema sung tsünga shibelenertem aser shiruru akhartem nokdangtsü atema Assam Police aser APP commando units longjemer maneni inyaksü," ta police-i ashi.

Assam Health Minister-i 'Beyond COVID - New Normal for Urban Population' sayaogo

Guwahati, Aami/June 17 (Agencies): Assam Health Minister Keshab Mahanta-i Brehostibarnü 'Beyond COVID - New Normal for Urban Population' sayaogo.

'Beyond COVID - New Normal for Urban Population' ya multimedia interactive kaket (document) ka lir aser jila aser yimti balala nung alitem atema tongtibangsa sayaogo.

Toupak 30 akekba document nung COVID wara ajanga jila balala kongshir aliba mapang yimya yimpong ana indang jembir. Kaket nung yimya tamajung dang ya 'Covidiot' aser yimya tajung dang 'Covideal' ta teshia lir.

Iba kaket nung 'Covidiot' indang yimya tamajungtem ya antagonist ka ama züngshir,

shirnoki pei taküm aser tangar lendongi idaksür aser iba ajanga timtem tekangshia ajurur, kasa mapang nung 'Covideal' yimya tajungtem ya wara pokteter aliba mapang shisa kaa telangzüba agütsüba, küm küma aliba aser lokti khuret angatetba lir.

Covidiot, kübok shisadang masüba, khuret shidak mabenba, tangar kümzüka toktsütsü atema auh ta maliba, yimya yimpong shidak mebeshiba desema lir, aser Covideal kübok wara indang aser iba dak sendaka aliba science indang metetnüba, tetsükdaksü ajangettsü atema pa/la shisatsü amshitsü renema aliba, yimya yimpong shidak beshiba aser tenüngdakba maparentem atema bendanga

agütsütsü renema aliba densema lir.

Pa/La yagi health tsütsü tetuyuba sülen anidaker, yimya yimpong shidak bendenloka beshir, küm dangshia atar aser nüngdaka apir yimya yimpong melenshir.

Kaket ajanga ya cartoon character tem saya ka lir, kong Covid wara pokteter aliba mapang aser wara süshia aoba sülen jila nung alirtem taküm liyonga aotsü atema yimya yimpong kar melenshitsü asoshi ajungmesotsü atema COVID-19 dak sendaka aliba science indang item cartoon tem shilem aser inyakyim ajanga tongmelang agi aser jangrademtsüka rasaa shia lir.

Iba mapa ya Dr Anamika

Ray Memorial Trust bushitsüngdang dak amendaka lir. Kaket madok tsüngda iba Trust yagi bushitsüngdanga yimya yimpong tamajung aser iba ajanga timtem bener arutsüba aser yimya yimpong tajung aser item tajangzüktem dak sendakba nung Message Matrix 50 renema liasü.

Trust-i Kaket tembanga mezülü tsüngda Guwahati kübok tesem balala nung nüburtem shimmer bushitsüngdang süa liasü.

'Beyond COVID - New Normal for Urban Population' ya UNICEF, Assam aser National Health Mission and Directorate of Health Services, Assam den longjemer Dr Anamika Ray Memorial Trust-i publish süogo.

Mizoram nung tech-based home care apps ka amenokogo



web aser mobile platform, 'Nishtha Teletrack' amenoktsüba yangi noksa nung angur.

Aizwal, Aami/June 17 (Agencies): Mizoram sorkari Covid-19 agi shiranger kidang temang anepalua alirtem kanga küm dangsa asadanga alitsü atema web aser mobile platform, 'Nishtha Teletrack' amenokogo.

Iba model ya Johns Hopkins Program for International Education in Gynecology and Obstetrics (JHPIEGO) den longjemer National Health Mission-i yanglu aser United States Agency for International Development (USAID)-i senotsü teyari agüja liasü.

Health minister Dr R

Lalthangliana, shibai iba platform ya virtual mode nung Bodhbarü sayaa liasü, pai iba tech-enabled temang anepalua alirtem kanga küm dangsa asadanga alitsü atema web aser mobile platform, 'Nishtha Teletrack' amenokogo.

Iba model ya Johns Hopkins Program for International Education in Gynecology and Obstetrics (JHPIEGO) den longjemer National Health Mission-i yanglu aser United States Agency for International Development (USAID)-i senotsü teyari agüja liasü.

Covid-19 tashidak menar timba akümba ajanga shirangerter mozükitem dak alia Covid-19 Care Centre (CCC) aser Community Covid-19 Care Centre

(CCCC) tem nunga anepalutsüsa akümer, ta pai ashi.

Centre-i tawa tetuyuba agütsür aliba lephsia Lalthangliana-i, tashidak keta aliba temaitsü tera sayurtem aser temaitsü mesayurtem mozükitem aser Covid-19 Care facility tem mesemi nongtepba nungi jenbotsü atema kidang temang anepaludaksür, ta ashi.

Paisa, iba sabang tasenba ajanga kindang temang anepalua aliba Covid-19 agi shirangerter ajangzüktsü imlaba lemsatep

Tele-track ya kidang temang anepalurtem atema comprehensive, integrated tech-based home care model ka lir.

Web aser android dak amendaker aliba platform ajanga Covid-19 agi shirangerter tajungba asadangtetsü aser kidang temang anepalurtem indang vitals tem anogoshia mangaoka yutetsü aser nüngdakba mapang physician tem den sensaksemtetsü.

Shiranger dak tashidak keta aliba temaitsü sayura iba platform ajanga digital osang agütsütetsü.

Tripura: Tetsür, tanur dak teka sangshiba atema CPI-M-i BJP lenirtem aitsü

Agartala, Aami/June 17 (Agencies): State kübok Belonia sub-division nung tetsür ana dak teka sangshiba atema Tripura nung opposition party CPI-M-i BJP lenirtem aitsüogo.

CPI-M-i ashiba agi, BJP lenir Anand Debnath, Monindra Das aser Bhuvan Das nungeri ali ka ozüing alema tashiyim agi rakzüktsü merangba mapang tetsür ana dak teka sangshia liasü.

BJP lenir asem ya North Srirampur Gram Panchayat (Chottakhola) züngsemtem lir.

CPI-M-isa, tetsürla ana semchirtem dak azükba atema BJP lenirtem aitsüogo.

Opposition party-i, BJP lenirtemi tetsürla ana indang ali ozüing alema rakzüktsü merang, ta ashi.

Tetsür ana ya Belonia sub-division, Siddhi Nagar kübok Das Para tesem nung alir Kanan Bala Das aser Alorani Das ta jangjaogo.

Kasa mapang nung BJP lenirtem yagi iba tesem nung Pradeep Das indang shilepdak ka dena raksatsü, ta shia aitsüogo.

Maneni CPI-M-i ashiba agi, iba

tatalokba indang osang metetdajaka police temi ken o bushitsü dangtsü atema atsiayonga liasü.

Ajisüaka local MLA Sudhan Das-i jenjang ka agiba sülen police temi iba ken o bushitsü dang tenzük.

Ken o dak sendakba nung ruling party Rajnagar Mandal Committee tir Ranjit Sarkar-i ashiba agi, item kibongtem ya sorkar ali ka mapang talangka atsünger lia liasü.

Paisa, CPI-M-i benokba ken o aija, iba tatalokba nung ruling party nungi züngsem ka danga densema maliasü, ta ashi.

"Opposition-i ruling party tenüing menüktsütsü atema teyazü ken o ka benokogo. Parnoki iba tesem nung tesunep aser yimjung raksatsütsü meranger," ta BJP leniri ashi.

Northeast Now den jembiba mapang SDPO Soumya Debbarma-i, "PR Bari police station kübok arrtsü dak sendakba nung mangatettep ka adok, police station nungi OC-i iba tesem semdangogo aser ken o bushitsü dangdar," ta ashi.



TIR YIMYIM

YIMOBILEM (EDITORIAL)

DIMAPUR ROGONÜ, AAMI (JUNE) 18, 2021

Covid jem agitsüla

Nisung aikati shirangyonga mozü mechner aser ajema metuner, kari arendaker aser kari tsübur, aji nisunger yimya, saka tanü asüng poktetba Covid tashidak wara nokdangtsü atema yabo Covid jem ya aginü maginü ta masü saka agitsüla akümer, kechiyong iba tashidak wara yabo mozü jem dang nungi tesashiba aser tetsübutü taketba lir. Tang asenok May ita tom ka nungi mokdang tenzükba, ano June 30 tashi atsülangogo. Tangbo iba mokdang anogo atsülangba kuli ya akhidang agütsüba kuli amai masü, saka kuli balaka agüja lir. Ibaji, Nagaland nung nisung teimbaka Covid jem (Vaccine) magii aliba ajanga lir ta metetdaksüogo. Atangji, taoba ita mokdang tenzükba mapang Nagaland nung Covid putetba jenjang dang nungi tang ya kanga agia tajemba kümogo, saka alima tasüng iba wara ya jajar asünungji, ano manger sangwa nung kechika ataloktsüar memetet, anungji state nung nisung shia iba wara den raratsü asoshi zep ta renemtsüla. Ibaji masü tashibo state government-i mokdangba sentong ya lapoktsütsü kanga nunnganga bilemstsü. Covid-19 tashidak wara nokdangtsü zep ta renembaji sü agi tebang nembanger senzüba ya kija masü mesüra lokti senden maliba kija yaa masü. Asenoki jungjunga bilemdangra, alima nung tasüba wara aliyonga kopiga kidang dang mongtettsü ? Kopiga sü agi tebang nembanger senzütettsü ? Aser kopiga lokti senden mali alima sünepa otettsü ? Item ajakji kodang bilemdangdir, Covid dang masü saka tanga tashidak asoshia anasai aruyonga asen temangi tashidak mesenji maitettsüsa zep ta renemtsübaji mozü jem agiba ya lir ta angatettsü. Iba jagi, tanurtem nema sozükli parnok kinü asüdang yongi tashidak tapu balala agi matongtsü atema mozü jem tutsür aser mozü tzü jemdaksür. Iba jagi asenoki mangur aser memeteter saka tanur temang nung mozü to agi mapa inyakba agi tanurtem meshirangi tain akümer. Kasaji, tanü alima nung tashidak tasen poktet shia iba tashidak nokdangtsüba mozü aser ano aneptsüba mozü bushiteta yanglutsü asoshi scientist-tembo amuia moi inyaker. Item ajakji alima nung meimchirtem tashidak wara agi kata mali kuma mesamadaktsünüba agi Tsüngremi scientist-tem nem shisatsü agüja inyakdaksür. Ajisüaka, asenok aikati Tsüngrem dakbo amanger saka mozü dakbo mamanger. Tsüngrem dakbo amanger asünungji junger aser shitak amai, saka shitak mesükba lenmang saka tasüba lenmangji aji asütsü. Tsüngrem dang amangba kija agi, kecha meinyakyonga chiyongtsü angutsü asü ? Tsüngrem dak amanga Pai dang anitsüji ta ser tayimtsü nunga, gari nunga mamentsü saka odang kidang ataa alinung tadongtsü ka atongtsü asü ? Tsüngremi aneptsütsüji ta amanga, shiranger saka mozü kidangi mao, mozü machi yipten nung dang taneptsü aru ata nung ajungtsü na ? Tsüngremi dang temetetba aser shisatsü agütsütsüji ta ser Tsüngrem dak dang amanga schooli mao kazü nung tashitemeteter akümtsü na ? Kodang item ajakji sarasadema bilemdangdir, asenoki asenoksasa mapa ajak nung Tsüngrem shilem o asen shilem na bendanga angatettsü. Noah mapanga, pa aser par kibong tzümetsüng nungi kümzüksü asoshi kecha mapa bolua, küm paikato tanga mapa kecha meinyak, rong to yanglua mekazüdaksüi Tsüngremi kotak nungi kotak tenyar yoka Ararat tenem tashi tobo, parnok den shiruru ajak to bener tua yutsüla. Yisua nüpkoker aneptsü dang to mapa bolua tenük nung lishi mezütsür tzü bushia orr shitokang ta meshii idangjisa ngudaktsüla. Kodang asenoki itemji bilemdangdir, Tsüngrem ya asen tebu aser asenok ya Par chir, anungji kibong nung mapa ajak tebu dang inyaksüba masü saka tanurtem tain kümerbo tebu dang nungibo parnoki inyaksüla mapa teimba akümer ta angatettsü. Tanü Tsüngremi asenok wara nungi kümzükünba agi scientist-tem ajanga mozü bushiteta bener arudaktsü nung, asenoki ibaji agitsü arendakbaji asenok kanga shisa maka asütsü. Tamang tulu agi Noah-i Tsüngremi odang kümzüksüji ta ser tsünglu aru tashi rong to meyanglu ata asübo, koda süla ? Nüpkoksang to agia Yisu dang, pai kecha mangurji, mapa bolua pa tenük shidoki tzü to bushia mouli ta nemnem nungbo koma süla ? Asenok alima nung ali tashibo asen taküm kümzüksü aser kibong mesütsü asoshi Tsüngremi tangatetba shisatsü dang agütsütsü aser tanungba mapa ajakji asenoki asenoksasa arakzua inyaksüba mapatem dang lir. Ashiko, na tang Covid jem magi ser kotaki atu nung, Tsüngremi nü dang kechiba na ni' yokba Covid jem magi (?) ta-ang asüngdangtsüa akok !

OLEMSABANG

SEN ASER COVID-19

~ Rev. Prof. M. Rongsen, Dilong Ward, Mokokchung

Covid - 19 tashidak ya nisung ajaki tsübuba aser maginüba tashidak tamajung rongnung ka lir. Kechiyong iba yagi, tular - tilar, takar - sensaker, tanur - tain, tobur tajung - tobur tamajung aser nungtuko aser atamata nisung kecha mebensi leperi atsür aor. Iba yagi nisung dak tetsübu aser tatenten poktedaktsür. Iba ya tasüba tesara aser Satan nok - nü ta ajatsü akok. Alima nungi tepela - tesünep aser rongsen rakzuka bener aobaji ibai lir. Aji oda iba ya Tsüngrem anemer, Pa sentong raksatsüba tashi ka lir.

Iba tashidak ya Sen den kanga junga sendaktepa lir. Kechiba iba Covid - 19 ya sen den sentaktep ta agatettsü kanga tongtibang lir. Saka iba indang ajak rasa-a yangi mezulumatsü. Saka tongtibangji ya - Iba tashidak ya satan nok - nü aser sen ya - a kasa satan nok - nü lir. Sen ya kecha masü saka osettsüset melentsü atema amshiba langka ka dang lir. Saka iba dak ya tamangu tashi ulura ka küta lir. Senji nisung nungdak tapu balala nung amshitsü yanglu. Saka meyiper iba sen yagi nisung azüoka amokbanger, ibai sen dak akütba tesümgangtsü tashiji lir. Sen yagi Tsüngrem masü ni külemang, ajak dang tali ni meimang ta nisung puwa - a atsür aor. Anungji Yisuei yamai ashi, "nenoki Tsüngrem aser Sen külemi metenzüktet (Mt. 6:24)". Kechiyong sen dakji Tsüngrem den saku sünüba tashi keta lir. Iba tashiji Satan nok-nü lir. Senji temenen masü, saka sen meimbaji temenen, sen bentenbaji temenen masü saka ochi mashiba lenmangtem ajanga sen bentenbaji temenen lir.

Laishiba nung sen meimba ajabga pei taküm aser pei kibong lendongi aiba asenok tansütsü asoshi zülutsüba otsü aika lir. Tatishitsü agi, Balaam ainkar ama (Züngdangba 23), Judas Iscariot ama (Mt. 26). Aji oda sen meimbaji Covid-19 tashidak dang nungi kanga agi tamajungba lir. Covid-19 tashidak jagi na shi temang nung tango mesashiteti sūdaksütsü aser sen meimba tashidak gaji nü tanela takum tango mesashiteti sūdaksütsü.

Sen aser Covid-19 tesendaktep nungi tangazüksü kar yamai :-

Tang ama ayanga chia-ajemtsü lenmang shibangba mapang aser shishilembatsü lenmang aika shibanga alidang nisung jenti tangar dang meshiteti timtemdagi. Tang ama tensa mapang nung nai sen rezünga yua aliba nungi agiteta nungdakba purtem den yariteptsü tenük lapoktsüla aser teka salatsüla. Aser lokti nung asen nuk agi ngua adianü jenti timtema alibaji Mission mapa masü no? Laishibai ashir, nü den aliba adianu timtem nung meima meyaritetra, aseni tenük agi manguba Tsüngrem meimera ta asübaji teyazü lir. Mission wadang tulutibaji, aser tang rongdak tenyaktsü mission mapaji Covid-19 refugees aser iba tongpang rara akoktsü inyakbaji lir ta angatettsüla. Aji oda Tsüngremi asenok dang Covid-19 wara agi ni timtema aser shiranga liasü, saka nenoki ni mesemdang ta meshilima? Arogo aser kibong aikati Covid-19 asoshi mapa tajung aika inyakba osang angashia kanga pela-a Tsüngrem tenüng asanger. Saka ano kari atsüayonga lishia ta sür ajungshiteperaba dang, lir.


Ano tang ama mapang nung central government-i sen talupusa agutsür. Sorkari Covid-19 wara tongpang ya akoktsü asoshi senotsü talupusa agutsür. Tetezü iba sen ya nisung taküm alitzüksü atema agutsüba sen lir. Anungji ibai azüh sen lir. Shir kibongi, shibai iba azüh sen miima pei senbong nung enokdir ayatai. Iba sen azüh sen asünung iba sen jagi nü senbong menentsütsü. Iba sen shibai ochi mashi agi chia-jungdir, iba sen jagi anangtsü aser kechiba ni azüh aketba sen chia-ajem ta sasatsü. Kechiba taküm alanzüksü sen nai rizünga ayur? Azüh sen jagi nür kibong züh kongra koda? Ochi meshi-i bentenba sensa süaka, iba sen ya kenyongi balaka lir. Nibo kanga atentena bilemstsür. Adianu kari iba sen ochi meshi-i amshir ta masü, saka asenok ajak tekümdangtsü atema lemsateperba dang lir.

Ano tang Covid-19 wara mapang Sorkari jang angadi talupusa-a agutsür. Iba jang ya-a nisung takum alanzüksü agutsür. Iba jang nung ya tiemtemer aser makamaitertem azüh mezüa lir. Iba jang ochi meshi-i miimzuka agirtem azüh mimji chisemtsü aser iba mim jang jagi ner kibong künü mesüra künübo timatemtsü, dakzua liang.

Kari ochi mashi inyakdar ta masü, saka asenok ajak kümdanga aliba ajanga Tsüngremer atakatem nungi jenbua alitsü atema lemsateperba dang lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Mapang ajak nung Khristan kaka asütsüla: Pastor Tony Evans



Southern Baptist Church meet- Send Conference nung pastor Tony Evans-i jembiba noksa nung angur.

June 17, 2021: Arogotem nung kin telesa bendanga züngshiba anema jembidang Dallas nung nungtugu Pastor, Tony Evans-i Khristantem dang khenpiga ka atema dang Khristan masütsüla saka mapang ajak nung Khristan asütsüla aser Khrista osangtajung prokba nung longjemer inyaksüla, ta ayongzük.

SBC missions agencies- International Mission Board aser North American Mission Board-i ayongzükba Southern Baptist Church meet- Send Conference nung nisung 10,000 den jembidang pastor Evans-i, "Asenok chichiba tajabaji khenpiga atema masü saka mapang ajak nung toklang Khristan asütsü atema lir, koba ajanga alima nung kodak yangertetsü. Asenoki asen linük jenjang tamajungba akümba tenük agi angur, aser iba ya Khrista tama mesüdaktsüba ajanga lir," ta ashi.

Khrista osangtajung prokba misson mapa inyaksü nükjidong nung anogo ananü Send Conference nung North

America nung pastor tem, pastor kibongtem aser Arogotem nungi züngsemtem aika aden.

Oak Cliff Bible Fellowship nung pastor aser Dallas Theological Seminary nungi doctorate mezüng angusang African-American, Evans-i linük tesem ajaklen yimtenren aser sobalibaren nung telesa adokba atema football asaya atishia jembiba.

Iba dak sendakba nung pai, ochi temeden atema Khristantemi referee ama tenzüksüla, ta ashi.

"Asenoki kodak yimli nung ketdangsertem ama inyaker, ajisüaka nisung aikati kodak yimli atema dang inyakdang alima nem teyari magütsür aser karibo alima atema dang tali bilemba agi kodak yimli atema meinyaker," ta pastor Evans-i ashi.

Arrshi küm 71, Evans-isa Khristantem dang, yimtenren aser kin nung ajemdaker Khristantemi telesa madokdaksütsüla, ta ayongzük.

"O jembitsü atema ni ano

maongka angutsü asü mangutsür memetet, anungji ni tebilemba ajak rakpoka jembitsü," ta pai ashi.

2020 küm coronavirus wara ajanga lokti tulu adenshiba nokdanga liasü saka tang coronavirus wara süngjemba sülen SBC senden ayongzükba katetogo.

Kin nung ajemdaker nisung bendanga züngshiba anema linük tesem ajaklen rara adokba aser police-i tashiyim amshiba mapang ka nung SBC senden kaogo.

Linük nung tayongzükba jenti lir, ajisüaka yimtenren aser kin telesa adokba tebilemstü ya Khristantemi koktetsü, ta pai ashi.

"Tsüngremi sentsü tapu ajak angur. Asenok kin balala nungi aser linük ka dang, aser Tsüngremi asenok angur. Laishiba ya Tsüngrem sentsüwangshi aser Pa yimli atema lir. Asenok longjema aliba ya yimtenren ajanga melemsadaksütsüla. Anungji longjemer nokdaksüla, kechiyong Kibubai asenok yok," ta paisa ayongzük.

China nung ketdangsertemi pastor Wu tang tashi mechioker

June 17, 2021: China kübok Sichuan province nung aliba Early Rain Covenant Arogo nung pastor, Wu Wuqing aser pa kinüngtsü, Xiong Meifang na April 1, 2021 nungi par kidang pua ayuba sülen sorkar ketdangsertemi tang tashi mechioker.

Pastor aser kinüngtsü na Chengdu City kübok Longquanyi District nung alir aser ketdangsertemi tena April 1 nü pua liasü, ta International Christian Concern (ICC)-i metetdaksü.

Chinese Communist Party (CCP) ketdangsertemi pastor Wu'er kishi aser corridor na tsüngda chain alena yutsü aser tena semdangi arurtema ki telungi aitsü memelar.

Wu-i police dangi aiben call süa jembio, ajisüaka tena tang tashi mechioker.

Pastor kinüngtsü, Xiong-i Arogo züngsemstem dang, "Asen kodaker Tebui kishi shibanga yutsüogo aser Pai mapang tetemsü nung

lapoktsütsü. Asenoki anogo shia police aser CCP ketdangsertem ateam sarasademtsütsü. Kibubai parnok melung nung jembiang," ta metetdaksü.

Taoba ita nunga Guizhou Province nung aliba Guiyang Living Stone Arogo nunga pastor, Yang Hua ketdangsertemi apuba sülen pa dak mejungi azük, iba sülen hospital-i anir oa treatment agia liasü.

Persecution watchdog-China Aid-i ashiba agi, May 23 nü Yang-i Qingdao nung Khristantem semdangtsü sentong liasü, saka police-i pa apuba sülen police station-i anir ao. Police station nung Guiyang Yunyan District Party Committee lenir kati pastor dak mejungi azükba sülen ketdangser kati medical personnel ka jaok. Iba sülen ang pa anasa aliba hospital kati anir ao.

2020 küm coronavirus wara kanga bulua prokba mapang nung China nung Arogotem aser

Khristantem kanga reshikangshia liasü.

China nung ketdangsertemi Khristan yimsü anema Bible Apps aser Christian WeChat public accounts shibangtsür, talisa May ita nungi Khristantem websites aser Apps nokdang.

Open Doors USA's World Watch List nung alima nung Khristantem tamajungba reshikangshiba linük 50 rongnung China ya jenjang 17buba nung lir.

China nung Arogo ajak ya Communist sorkar atema amokmeren ama züngshir aser bendangertem dak tenük yoker.

China nung reshikangshi ajangshiba ya Khristantem dang masü saka Uigher aser Muslim nungera million 1 dak tema Xinjiang province nung aliba internment camps nung yur reshikangshir. Item camps nung parnok dang secular sensotem akümtsü aser Communist Party sorkar kübok alitsü atema tesayuba agütsür.

ANOGO ABEN TSÜNGREM DEN

Khristan ka mapa

Saka nai ajak nung teshisadangba liang, timtem aremang, sayutsüngir mapa inyakang, ne tenzükba mapa abensaang. 2 Timoti 4:5

Pauli Timoti dang Tsüngrem O sayutsü renema alitsü ashi (t.2). Peteri pa shiti azünger dang na atema osang agütsütsü renema alitsü indang ashi. Pauli Khristan shiai mapa pezü asoshi renema alitsü ashi. Mezüngbuba, mapa ajak nung teshisadang liang. O tanga ka nung, "yi agi temesep... saka tanela agi sünga liang" (Efesa 5:18). Teshisadang liang tetezü ochi nung teti renema alitsü indang ashiba. Tanabuba, timtem aremzükang ta ashi. Timothy sayutsüngi dang timtem ajurutsü ta Pauli ashi (2 Timoti 3:12). Saka odang aremzükang ta ashi. Tasembuba, sayutsüngir mapa inyakang aser Pezübuba ne tenyaba mapa abensadakjang.

Iba tajungshiba ya Timothy aser sayutsüngirtem atema dang asenoki bilemstü akok saka ibai tanü asenok asoshi lir. Tsüngremi Khristan shia nem teinyaktsü mapa agütsü aser asenoki aji kümdanga aser tamang katetta inyaktsüla. Ibai tila tanurtem den inyaktsü akok mesüra Sunday School tesayur mesüra choir nung atentsü akok. Ajaki pei ataba mapaji sayutsüngir mapa ama inyaktsüla. Iba tetezü town ka nungi town kati, yimtsüng ka nungi yimtsüng kati oa osangtajung sayutsüngir ama sayutsüngitsü ashiba masü. Iba tetezü na taküm ali tashi Khrista ne dak ngudakja alitsü ashir. Ano iba tetezü nai ne tamang kibong nung, medemertem den aser külem mapa inyakerem den lemsateptsü ashir. Ne O tem jagi mekümsüki alirtem parnok taküm teti taküm daki melenshitsü akok.

Oba, Nai kü nem Ne O tangar den lemsateptsü tenzükba mapa agütsü nung Ne tenüng asanger. Amen.

Gaza Khristantem timtemba atema Methodist Arogoi Israel aitsür

June 17, 2021: Methodist liasü," ta Synod-i bangzüng Arogo lenirtemi Gaza aser West renem.

Bank nung Khristantem atema Conference guidance tensa tamajungba akümba nungsa Khristantemi timtem atema Israel nem tai ajangshibaji Palestine nung tongloktsüogo. ketdangsertem aser Hamas

Arogo lenirtemisa Israel lenirtemia jangjaogo. nung coronavirus vaccine takok Birmingham Synod-isa, ngua agütsüba atema Israel "Coronavirus vaccine takok lenirtemi pei sasa teyaksanga ngua agütsüba atema Israel-i jembiba atema aitsü. peisasa teyaksanga jembir saka

Circuit Meetings aser Palestine nung District Synods-i Israel ya kin vaccine peria magütsüba atema aitsütsü telemtetba agi, aser ibaji Tamalen Israel/Palestine nung sangdongba report "Cry

taruba Hombarnü conference for Hope" tetshia conference nung sangdongtsü lia iba osang notebook ajangasa West Bank aser Jordan Valley nung ali telung nung prokshio.

Arogo indang guidance booklet nungsa Birmingham metetdaksü.

Synod nung renemba bangzüng "Ali atsünga agiba ajanga ka densema lir. "Gaza aser West Bank aser Gaza nung West Bank nung aliba Palestine tensa majungba aser UK nung nung timtem atema Synod-i Yihuda nung sempaba kanga tebilemstü akar; parnok küm 50 shi tangar kübok alir, talisa Conference-i tetesüba küm pezü tamajungtiba metetdaksü.


OLONG PAITEP # 5848

	1				2	3				
4			5							6
						7				
	8									
	9			10			11			
						12			13	
14										
						15				
		16								

TIPILEN		LANGTSÜNGLEN	
2. Sü jeplok	- (4)	1. _____ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _____ kibur	- (5)
15. Mejanga onü	- (5)	13. Tebur tembar tsüngda	- (4)
16. Tzü shiruru ka	- (4)	jatepba	- (4)

OLONG PAITEP # 5847 TELANGZÜBA

LANGTSÜNGLEN :	TIPILEN :
1. Yongya, 2. Moko, 3. Marok,	1. Yimlibilem, 4. Anak, 5. Tangar,
5. Teronem, 6. Nung, 8. Amajok,	7. Aya, 8. Arong, 11. Par, 13. Lemjem,
9. Jangzü, 10. belem, 12. Rong.	14. Oagi, 15. Mulung.



TABENSA KINUNGTSÜ TAKÜM

Kinungbo : Hai, tanübo na ya kechi nungsa jajadener aka? Oda ni kidang kibong nung achi ajemtsü ajak peria toktsür, aji agi tenük masüng aser mepelai jajadener asü?

Kinungtsü : Ayaa, oda nai bilemba amaji masüako, oda asen kibong nung nai achi ajemtsü peria bendena toktsüaka, aser asenok kecha shisabulu makai liaka, temeimtsü oda nai khen jung junga bilemdangangjo, asen kidanger tu kibong nung achi ajemtsü kechabo aka masü nung ano temeimtsüka shirangba tu kecha tajungba makümer aser kanga mejungi shiranga lir. Anungji oda ana tenüng nung ni tang par dangi chiyongtsü kar bener otsüti ta ser odanger arurba ati.

Kinungbo : Hi odang tokjang, shirangerji yakta jungatoksü nung koda? Nibo tanepa nungdak kati apusoti nu. Oda taonung dang ni kidangi shilangdang kidang sorjok züb ta dang temer liangma nu.

Kinungtsü : Ayama oda nai dang mangateter ashi jungaka mejungaka asen mapang ajak nung asen temeket kiyonger kidanger den dang ajak nung lemsatepa yaritepa alitsü nung koda? Oda tangar den yaritepa lemsatepa alitsüji nai khen agi bilema maruru na? Oda pei kibong saseb atema dang bilema aliba agibo alima ya tebur majungtsü ama nibo bilemer adi, aser naia kanga dang junga bilemdang nungbo ajisa tajungtiba asütsü masü nu?

Lilir : Mr. S. Repa Pongener, (Mon Bosti, Assam)

AO OSHI ANGAZÜKDAK:

TANÜ ANGAZÜKTSÜBA OJANG



Kami
(v) O jembipet (slip of tongue)
* Pai mebilemdangi jembiba agi telok tsüngdang o **kami**.

Kamra
(n) tepi temejeptep (thigh joints)
* Tetsüng agi len talang jajadang **karma** aizüker.

NAI-A YA METETTER MA?

MAY 2021' NUNG SAYABA KEN TASEN KAR:

(Yashi adok nungi...)

JLana Del Rey	- "Blue Banisters"
Lana Del Rey	- "Text Book"
Lana Del Rey	- "Wildflower Wildfire"
BTS	- "Butter"
Cam Wallace & Wiz Khalifa	- "Retail (Remix)"
Lil Nas X	- "SUN GOES DOWN"
Marshmello & Jonas Brothers	- "Leave Before You Love Me"
Wiz Khalifa	- "SKI Weedmix"
Marshmello & Carnage	- "Back in Time"
Master KG & David Guetta	- "Shine Your Light" ft. Akon
Lil Quill	- "Freestyle"
Lute	- "Myself" ft. Devn
Meek Mill	- "Flamerz Flow"

TANÜBO NAI LANGZÜANG

Q. World Giving Index nung India koba jenjang nung lir?
A.14 B.01 C.10 D.41

(Taruba adok nung onoki langzüksü)

YASHI ADOK TELANGZÜBA : Union Ministry of Human Resource Development

SUDOKU # 5889

TELANGZUBA # 5888

9			2	8	6	4		5	3	6	8	1	2	7	4	9	
	8	3	5					2	9	8	7	3	5	4	2	1	6
4			7	3		1	8	5	2	4	1	9	6	7	3	5	8
	1	5		7	6		9		7	9	4	2	8	5	1	6	3
	6	9	4		3		8	3	2	5	6	9	1	8	7	4	
8			9		1			1	6	8	4	7	3	9	2	5	
			6	9	7		2	1	8	5	2	1	4	9	6	3	7
7			3			5		9	6	7	3	5	2	8	4	9	1
6				4			3		4	1	9	7	3	6	5	8	2

OJANG LUTEP # 5433

DEMMEER	:	<input type="text"/>
ERAS	:	<input type="text"/>
ÜKCHTSIR	:	<input type="text"/>
NGJAMEJAI	:	<input type="text"/>
ISETJASHA	:	<input type="text"/>
ADANRASG	:	<input type="text"/>
AKAJ	:	<input type="text"/>
NDE	:	<input type="text"/>
TCHSÜKIR	:	<input type="text"/>
MADKÜOK	:	<input type="text"/>

OJANG LUTEP TELANGZÜBA # 5432

TAMASA YONGI JUNGA SHISADANGA NÜKLA YUR SÜLEN MAPAREN INYAK TENZÜKANG

TAN HOPTA ATEMA - KOMA SÜLA ?

Q. Private mozü kidang Covid agi shiranger anepaluba jenjang (treatment charges) ya government-i sensaker lenji tera oa latettsü nunga koma süla ?



Lucknow, June 17, 2021: Ayodhya nung ali aliba ochimashi ken o dak sendakba nung Brihostibarnü Lucknow nung Congress party nung inyaktermi longkak aitdang Uttar Pradesh police-i longkak aiterkem apuba noksa nung angur.

India nung anonisung 67,208 dak Covid putet aser 2,330 asü

New Delhi, Aami/July 17 (Agencies): Tesüiba ghonda 24 tsüingda India nung ano nisung 67,208 dak coronavirus tashidak putetogo aser tang tashi nungbo linük nung nisung ajak agi 2,97,00,313 dak coronavirus putetogo, ta Brihostibarnep 9:00 ako nung Union health ministry-i metetdaksü.

Tanü agi anogo 10 tashi anogo shia nisung lakh 1 den tajemba dak coronavirus puteter.

Linük nung anogo shia iba tashidak agi asürtem tajemba kümard, ajüsüaka tanü agi anogo pezünübuba anogo shia nisung 2,000 dak tema iba tashidak agi asür aser tesüiba ghonda 24 nunga nisung 2,330 süogo.

Tanü agi anogo 35 tashi

anogo shia iba tashidak agi shiranger anepba dang nungibo iba tashidak putetba tajemba; tesüiba ghonda 24 nunga coronavirus agi shiranger 1,03,570 anepogo.

India nung tang iba tashidak agi teshirangdakpur 8,26,740 dang kümogo aser tesüiba anogo 71 tsüingda tang teshirangdakpur tajemba.

Hopta shia coronavirus positive putetba shilem 3.99 lir aser anogo shia positive putetba shilem-a 3.48 dang kümogo, ta Health Ministry-i metetdaksü.

Tang tashi nung linük nung coronavirus samples ajak senteper crore 38.52 tendangogo aser vaccine dose crore 26.55 agütsüogo.

Ano tanga osang ka nung Maharashtra state task force-i, taruba hopta 2-4 tsüingda state nung Coronavirus third wave tenzüksüa akok, ta metetdaksüogo.

Bodhbarnü Chief Minister, Uddhav Thackeray leniba nung coronavirus third wave atema terenemshiba jenjang asadanga senden nung iba osang ya metetdakja liasü. Iba senden nung Covid task force züngsemtem, state health minister aser tongti ketdangsertem aden.

State nung coronavirus third wave mapang nung teshirangdakpurtemji second wave dang nungi anasü agi timba asütsüa akok, ta senden nung metetdaksü.

Mapa manguba lanurtem atema India-i UNICEF den tezüngzüktep agi

New Delhi, June 17 (Agencies): India nung lanurtem mapa manguba tebilemtsü bentetsü aser skill training agütsütsü atema Brihostibarnü India-i United Nations Children's Fund (UNICEF) den Statement of Intent (SoI) tezüngzüktep agiogo.

Talisa India linük nung matamabensar lanurtem, tangalen alir lanurtem, rara ajanga takoksa angurtem, anojungi kibong akümba lanurtem aser nisung shibelenba ajanga takoksa angur lanurtem dak rangloker inyaksü.

SoI tezüngzüktep agiba sülen Minister of State for Labour & Employment (Independent

Charge), Santosh Kumar Gangwar-i sangdong ka ajanga, lanurtem mapa manguba tebilemtsü atema par ministry aser UNICEF nati longjemer inyaksü, ta metetdaksü.

Iba (State of Intent) tezüngzüktep agia Labour & Employment Ministry Secretary, Apurva Chandra aser India nung UNICEF Representative, Yasmin Ali Haque nati sign asü aser ibaji Chief of Generation Unlimited, Youth Development & Partnerships, UNICEF India, Dhuwarakha Sriram aser YuWaah Chief Operating Officer, Abhishek Gupta nati kulisüa liasü.

Iba mapatong ya India nung UNICEF multi-stakeholder-YuWaah leniba nung inyaksü.

2019 küm tenzükbba YuWaah-i India nung lanurtem nem shisaliok nungi tangazükba akatsü aser mapa angazüka senso tajung kaka kümdaktsütsü nükjidong nung inyaksü.

2030 küm tashi nung YuWaah-i lanur million 100 nem loktililiba-rongsenketsüng tsütsü lenmang sayua maangka agütsütsü aser lanur million 200 nem skill training agütsütsü nükjidong lir. Item nükjidong ataloktsü atema MoLE, UNICEF aser YuWaah-i longjemer inyaksü.

Chhattisgarh state sorkari Covid third wave atema renemshir

New Delhi, June 17 (Agencies): Chhattisgarh state sorkari coronavirus third wave atema renemshi tenzüka state nung aliba hospital ajak upgrade süa facilities tasen aika amenokdar, ta Brihostibarnü osang ka ajanga metetdaksü.

Chief Minister, Bhupesh Baghel-i, state nung health infrastructure tajungba akümtsü atema akokba tashi ajak inyaksü aser state nung kanga tezülen alirtemia medical facilities melamela angutsü atema renemdar, ta metetdaksü.

Chhattisgarh state sorkari district hospitals dang masü saka block-level hospital ajak renemshia facilities balala amenokdar.

District Collectors ajak dang hospitals aser health centers upgrade asütsü atema anogo 15 tsüingda sentong aser budget metetdakjang, ta chief minister-i tuyuogo.

Chief Minister-i ashiba agi, tesüiba ita trok tsüingda state nung coronavirus agi shirangertem yaritsü atema ICU, oxygen cylinders, yipten aser ventilators aika amenoka liasü.

Coronavirus wave tasembuba atema medical oset ajak renema alitsü nüngdak, ta pai ashi.

State nung aliba hospital ajak nung operation theatre, labour room, laboratory, ICU, ventilators aser blood bank amenokba den mozü angati agütsütsü.

Iba dak alia item hospitals nung Pediatrics, Gynecology, Anesthesia, Pathology, Medicine & Surgery nung post graduate doctor tem shimoktsü; post graduates doctor tem manguba tesemtem nung post graduate mesüaka Pediatrics, Gynecology, Anesthesia, Pathology, Medicine & Surgery training agiba doctor tem shimoktsü.

West Bengal CM Mamata-i aluyimertem atema scheme tenzüksü



Kolkata, July 17 (Agencies): Brihostibarnü West Bengal sorkari aluyimertem atema Krishak Bondhu scheme tenzüksüogo, aser iba scheme kübok state nung aluyimertemi tajemba agia sen 4,000 tajangzük angutsü.

Chief Minister, Mamata Banerjee-i, 'Notun Krishak Bondhu Scheme' ya ajanga state nung aluyimer lakh 60 tajangzük angutsü, ta metetdaksü.

Brihostibarnü Chief Minister-i twitter ajanga, "Sorkari Krishak Bandhu Scheme tanaben tenzüka küm shia aluyimer ajak nem senotsü teyari anasü agi timba agütsütsü, ta ni tepela nung sangdonger. Aluyimba li acre 1 mesüra iba dak tali alir aluyimertemi sen 5,000 nungi 10,000 tashi angutsü," ta metetdaksü.

"Iba dak alia aluyimba li acre 1 den tajemba aliba aluyimertemi küm shia sen 4,000 angutsü. Onoki nangzükba onük 10 ataloktsütsü atema West Bengal sorkari meranga inyaker," ta Trinamool Congress tongti, Mamata-i

metetdaksü. "Centre-i sen ajema agütsür, aser ibaji-a aluyimer ajakibo mangur. Central scheme kübok alu nung aayangertemibo tajangzük mangur. Aluyimer aikati tanüsa (June 17) sen angutsü aser tanüngba aluyimertemi kobi melii angutsü," ta lai ashi.

Aluyimertem dang lai, temsüa aliba aluyimertem nem senotsü teyari agütsütsü atema telemtetba agiba ya lar sorkari maneni raraba ajanga lir, ta ashi.

"2018 küm West Bengal sorkari Krishak Bandhu scheme ya tenzüka liasü aser iba scheme ya linük atema tatishitsü tajung ka aküm," ta lai ashi.

"Iba sülen 2019 küm Pradhan Mantri Kisan Samman Nidhi (Central scheme) tenzü. Medemdangra state scheme ya tajungba, kechiyong iba scheme ajanga aluyimertem nem tajangzük timba agütsür," ta lai metetdaksü.

Mamata Banerjee-i district magistrates ajak dang tekarakba nung aluyimertem nem sen lema agüjang, ta tuyuogo.



June 17, 2021 nü Kolkata nung tzunglu sashia aruba sülen tzü metsünga alidak shiranger ka cycle cart nung anir aoba noksa nung angur. Brihostibarnep Met department-i, tesüiba ghonda 24 tsüingda Kolkata nung tzunglu 144 mm aruogo, ta metetdaksü.

July tashinung Japan-i vaccine passport amshitsü

Tokyo, Aami/June 17 (TYO): Alima nung sorkar balalai tourism aser business trips tem tanaben tenzükshitsü atema atidangba mapang ka nung Japan-i taruba ita nungi Japan nunger senzüsemponger atema vaccine passport yanglua amshitsü, ta Brehostibarnü ashi.

"Bendang lima semdangba mapang nüngdaker nem mozü agiba kuli kaket agütsütsü onoki tang teyangludak lir," ta sorkar indang odongtar Katsunobu Kato-i osangbener dang ashi.

Iba kuli kaket ya digital nung masü kaket nung alitsü aser taruba ita nungi local government temi agütsütsü, ta pai ashi.

European Union-ia taküm atema digital vaccine passport yanglutsü inyakteper, anungji raliwalir nüngdaker asoshi tepelatsü osang lir, aser EU linük kari national level nung kuli

kaket agütsütsü sentong lir. EU nung amshiba kuli kaket nungya nisung ka COVID-19 mozü agi asü magi, mesüra virus ya pa/la dak liasü asü masü, tendangba nung negative adok asü masü aser taneptsü ngur asü masü, ta osangtem alitsü.

Taoba ita Washington-ia America nunger COVID-19 mozü agir alirtem bendang limai oner asoshi documentation balaka yanglutsü sentong lir, ta shia liasü.

Saka iba tasa ya tesem kar atema majung lir, talisa Florida aser Texas ama US state tem nung vaccine travel document ya nüburtem temeden nung aibelenba amai bilemer.

Japan nung company ketdangsürtemi vaccine document ya kanga aginer, kechiaser ibaji ajanga mapa balala atema senzüsempongba nung yaritsü.

Biden aser Putin nati Geneva senden tushi, saka obang mapu lir



Swiss Tir Guy Parmelin, tiyong nung alisang-i US Tir Joe Biden (achichi) aser Russia Tir Vladimir Putin na den Geneva, Switzerland nung aliba 'Villa la Grange' nung ajurudang taongoka noksa nung angur.

Geneva, Aami/June 17 (Agencies): United States aser Russia tir anati Geneva nung parnok ajurutepa jembishinüba tenüng tushi, saka 2018 küm sülen tang mezüngbuba ajurutepba senden nung terenlok tulu meliasü.

Obang mapuba liasü, saka kanga tulu masü, aser Russia-i Cold War tasen ka maginer, ta US Tir Joe Biden-i ashi.

Biden ya yimtenren tsütsü nübu tejen ka lir aser tena tangatetba kasa liasü, ta Russia Tir Vladimir Putin-i ashi.

Tena tsüngta senden ya ghonda asem shi amen, koba renema aliba dang tajemba liasü. Tena jembishinü nung mapang tali indoktsü menüngdak aser Russia den tesendaktep renloktsü akok, ta Biden-i ashi.

Telok ana yagi nuclear arms tazüokba indang jembishinü tenzüktsü molungtep. Tenati par ambassador tem linük ana yimtibai meyipa arudaktsütsü ashi, koba 2020 tir election nung Russia-i shilem agi, ta US-i tai tongloktsüba sülen March ita tangatetep nung ainshia liasü.

Ajisüaka Geneva nung Bodhbarnü iba senden amenba mapang cyber-security, Ukraine aser Russian

opposition lenir Alexei Navalny onük amala nung leni marutep kar liasü.

Navalny ya tepuokdak asünungbo Russia asoshi timtem tulu alitsü, ta Biden-i ashi.

Iba senden ya mamendang linük anaprongi tesendaktep kanga mejungi kumogo, ta shia liasü.

Tepuokdak alirtem melenteptsü asoshi Putin-i olen ka shisem saka cyber-attacks tsütsü Russia-i inyakba mali aser Russia nung cyber-attack ya timba US nungi pokteter, ta Putin-i ashi.

Longkak aittsü temeden densema human rightsü nung telok ana obang khenyongi mapu liasü.

Tawa anogo 24 achi-ajem mesüi longkak aitsang Navalny asoshi US-i bilemetsüba Putin-i magizük.

Navalny-i ozüng sendok aser Germany nung temang anepaluba sülen Russia-i meyipa shilangba mapang tepuokdak ayutsü meteta liasü, ta Putin-i ashi.

Capitol nung rongrong adokba mesüra Black Lives Matter movement ama Russia nunger litsü nung temdangsünang maginer, ta pai ashi.

China-i space station tasenbai astronauts tem yokogo



Long March-2F Y12 rocket nung China nunger astronauts mena aliba Shenzhou-12 spaceship bener Jiuquan Satellite Launch Center, Jiuquan, northwestern China nungi apusoba noksa nung angur. China-i nisung asem mena aliba spacecraft ya space station tasenbai Brehostibarnü yoka liasü.

Beijing, Aami/June 17 (Agencies): China-i küm pongu nung tang mezüngbuba nisung mena aliba Shenzhou-12 anünglaki yoka pari United States den anünglak inyakyim nung toktepba tashi itshir.

Shenzhou-12 tetetzü "Divine Vessel" ya China northwest tsütsü Jiuquan Satellite Launch Center nungi Brehostibarnü 01:22 GMT (ako) nung ayamesoba indang sorkar meyong CCTV television ajanga live video sayua liasü. Alima nungi apusor ghonda tenet shi lir iba spacecraft ya China indang space station nung abeb, ta China indang space agency ajanga ashi.

Shenzhou-12 craft ya takok ngua Tiangong station indang core module indang forward port nung anen, ta China Manned Space Agency nungi sangdong ka ajanga ashi.

Iba spacecraft ya Long March-2F carrier rocket nung

bener yoka liasü. Iba spacecraft nung nüngjang petinu shisadanger (astronauts) tebur asem - Nie Haisheng, Liu Boming aser Tang Hongbo bener atu.

CCTV live video nung Shenzhou yagi alima indang atmosphere ajangba mapang teka agi junga lir ta sayu aser booster pezü sadanga liasü.

"Tayimtsü ya kanga anükalemer liasü. Ibai mera mezüngbuba lir. Ano mapa jenti lir," ta China indang manned space programme nung deputy director, Chen Shanguang-i osangbener dang ashi.

Orbit-i aiba sülen spaceship yagi in-orbit space station core module Tianhe nung anentsü, ta CCTV ajanga ashi.

Astronauts tem ya core module nung anenzüktsü aser orbit nung ita asem alitsü.

Nisung abenba spacecraft ya jenjang tajungtiba nung yanglu, ta Shenzhou-12 indang deputy director designer, Gao

Xu-i ashi. Shenzhou-12 ya section asem agi akumba lir - orbiter module ka, return module ka aser propelling module ka, aser ano sub-system 14 lir.

Osangbener den jembiba mapang, iba spacecraft ya "vessel of life" amai lir, aser iba ya ajanga orbiting Tianhe core module-i astronaut asem anir atuba kistung masü saka anogo 90 shi nung parnok ya alimai anir alutsü imlar, ta Gao-i ashi.

China-i taküm space station yanglu tenzüka Tianhe ya saya, koba station indang module asem rongnung mezüngbuba aser tulutiba alitsü.

China-i tesüsa nisung mener anünglaki spacecraft yokba ya 2016 küm Chen Dong aser Jing Haipeng ya liasü, koba Shenzhou-11 spacecraft ajanga Tiangong-2 dangi yoka liasü aser yangji parnok ita ka shi ali. Tiangong-2 ya prototype space station ka lir.

North Korea nung chiyongtsü agi anünger

Pyongyang, Aami/June 17 (Agencies): North Korea lenir Kim Jong-un-i par linük nung chiyongtsü agi anünger, ta shiogo.

Linük lenirtem senden ka amenba mapang, "Nüburtem indang chiyongtsü tensa mejungi akumer," ta Kim-i ashi.

Taoba küm yipru tesashi aruba ajanga aluyimba tsütsü nükjidong metongtet, ta pai ashi. Taoba küm yipru North Korea nung yipru tesashi arua tzümetsüng adoka liasü.

Iba linük nung chiyongtsü nung sen temlokba osang lir, aser somomu seret ka nung sen \$45 (India nunger sen 3000 dak tema) meshir, ta NK News ajanga ashi.

COVID-19 tashidak prokshia aoba azüoktsü mechi North Korea-i arrtsü ajak

shibanga lir. Iba mechi China den shishilempaba ajungbena ajema akum. Chiyongtsü, ali temu aser toztü nung North Korea ya China dak metaloka alir.

Ajidang masü par nuclear inyakyim mechi linük balalai tenokdangba agüja North Korea timtem nung lir.

Linük yimtiba, Pyongyang nung tan hopta tenzükba Workers' Party Central Committee senden nung leniri linük nung chiyongtsü tensa indang jembia liasü.

National industrial output ya taoba küm dang nungi taküm quarter ka agi timba kumogo, ta Kim-i ashi.

Iba senden nung linük lenirtemi US aser South Korea den tesendaktep indang jembitsü akok, saka tang tashi

osang tejangja sangdonga mali.

April ita Kim-i timtem balala ajuruba nangzük aser ketdangsürtem dang nüburtem timtemba tera danga ajemdaktsütsü mechi 'Arduous March' alitsü ayongzüka liasü.

Arduous March ya North Korea ketdangsürtemi linük nung 1990s ayawara mapang amshiba ojang ka lir, aser iba mapang nübur ajak külemi chiyongtsü peria achi-ajem mesüi ayar.

1990s nung Soviet Union laoba ajanga North Korea nunger asoshi teyarir tongtipang linük makai akum.

Iba mapang North Korea nunger yaseta asüba tejangja memetet, saka nisung million asem shi asü südi, ta asadangteta lir.

Advisor Sukhalu-i Zunheboto semdang



Zunheboto, Aami/June 17, 2021: Brehostibarnü Advisor, School Education, K.T Sukhalu den Zunheboto DC, Peter Lichamo aser tangartemi Covid Hospital, Zunheboto semdangba mapang tangokba noksa ka yangi angur.

Zunheboto, Aami/June 17, 2021 (TYO): Covid-19 tensa dak sendakba nung, maparen reprangshimtsü asoshi, Brehostibarnü (17.06.2021) Advisor, School Education, K.T Sukhalu-i District Covid Hospital, Zunheboto semdang. Iba Covid Hospital semdangba mapang, Advisor den Deputy Commissioner, Zunheboto, Peter Lichamo arua liasü, ta sangdong ka ajanga metetdaksü.

K.T Sukhalu-i ashiba agi, tang ama Covid-19 tensa mapang, doctor aser and frontline workers tem dang masü, saka senso ajaki Sorkar ajanga latettsüba temzüng tem nung anidaksüla aser ajaki angateta khuret abentsüla.

Medical takotetemi ashibatem/teyubatem angatsü melena social media sabang ajanga prokba tiyazü aser olulu osangtem nungang nübur aikati amanga anidakba angashidanga kangasa mepelar, ta pai ashi.

Sukhalu-i medical department den telongjem nung

inyaktsü aser vaccine agiadoktsü asoshi sensopurtem ayongzüka liasü.

CMO ajanga metetdaksüba asalentong tem aser rondok maparen ajak takaratiba nung achaayanga inyaksangshitsü, ta pai nangzük.

Iba Covid Hospital semdangba mapang, Advisor-isa senotsü teyari den PPE osettem tenla agütsü.

Zunheboto nung tang teinyakdak aliba two-lane lenmang maparen dak sendakba nung osang agütsü asoshi, DC kidang, Sukhalu-isa NHIDCL, Madhucon Company, Sumi Hoho, Zunheboto two lane construction monitoring committee aser Sumi officers' union, Zunheboto tentettem den sensaksema liasü.

Sumi Hoho, General Secretary, Nikheto Jimomi-i ashiba agi, District Administration den longjemer monitoring committee-i kanga dang meranga iba maparen inyakdar aser senotsü dang peria lira iba lenmang ulushitsü

merangdar, ta pai shisem.

ADC Zunheboto, Moa Longkumer-i, temenok agütsür aliba tesem 57 lir, kong timtem kecha melii inyakdar, saka tesem aika nung temenok magütsü lir aser item tesemtem atema NGOs-i ali kibur den jembidar, ta ashi.

District Statistical officer aser President, Sumi Officers' Union Zunheboto, Lhokiye Yephthomi-i, lenla ajak nungi angatetepa aser longjemer inyakra, Zunheboto renloksü asoshi asenok mangdang ataloktsü, ta ashi.

Maneni, Zunheboto indang lenmang mejungi aliba ngua Sukhalu-i sasa bilemstsüba lemsatop aser iba two-lane project ya tenokdangba/mepetmesü kecha melii renemtsü nungdaker, ta ashi.

Iba maparen atema senzusenbongba mapang amshitsü asoshi, Advisor-isa Zunheboto two-lane construction monitoring committee nem sen lakh 2 tenla agütsü, ta kasa sangdong nung shia lir.

Sür Küm 3 Ajungba Bilemteter



Late. I. Masa Ao (Missionary): Changtongya Tasüba Anogo : 18th June 2018

Teti dang meim-a aser aküm agaja aliba tsürabur, Tanü anogo nai onok toktsür aoba bilemteta kanga dang menungra-a bilemer aser sarasadema amonger.

Temeim Kinungtsü, Chirnur, Semchir, Kinunger aser Anükapang.

New Jalukie nung vaccination drive ayongzük



Peren, Aami/June 17, 2021: Mhainamtsi Primary Health Centre, Peren nung PWDs (Person With Disabilities) atema Vaccination Drive ayonga agiba mapang, PWDs indang President, Ngaugongpe nem Covid-19 vaccine indang mezüng dose agütsüba noksa nung angur.

Peren, Aami/June 17, 2021

(TYO): Brehostibarnü, Social Welfare Department den Medical Department, Peren longjemer New Jalukie Council Hall nung Persons with Disabilities (PWDs) atema awareness den special vaccination drive sentong ayongzükja liasü, ta sangdong ajanga metetdaksü.

Iba sentong nung, Zonal Leprosy Officer, Dr. Kiholi-i, PWDs aser nüburtem atema COVID Vaccination indang tekümdangtsü nung tongmelang agi telok dang metetdaksü.

Covid-19 vaccine dak sendakba nung nübur mamangdaksütsüsa mesüra mashileni anitsüsa

nisung kari olulu osang prokba aser mejangjai tiyazü osang yangluba indang nung lai jembia liasü.

PWDs indang President, Ngaugongpe-i 'kechiba matamabensar nisungtem vaccine agitsüla?' ta asüba onük nung ajemdaker tatsüka jembi. Iba den bendenloksema, Vaccination drive mapang, nüburi Sorkar mapatong nung amalitepa inyaktsüla, ta pai ayongzük.

Iba sentong nung, CDPO Jalukie, Namhuheing menden liasü aser New Jalukie Village Council Chairman-i tepela anküp o jembi, ta kasa sangdong ajanga metetdaksü.

'Bullet Train' April 2022 nung sayatsü



New Delhi, Aami/June 17, 2021 (Agencies): Hollywood star Brad Pitt indang taruba film - 'Bullet Train' sayatsü asoshi anogo sangdongogo. David Leitch-i direct asüba film ya April 8, 2022 nü sayatsü tebilemba lir.

Pitt dak alaka, 'Bullet Train' nung Joey King, Andrew Koji, Brian Tyree Henry, Michael Shannon, Aaron Taylor-Johnson, Hiroyuki Sanada, Benito A Martinez Ocasio aser Sandra Bullock nungeri shilem agiba angutsü, ta Variety sangdong ka ajanga metetdaksü.

Zak Olkewicz-i iba film indang screenplay zülutsüogo. Kotaro Isaka-i züluba 'Maria Beetle' kakat nung ajemdaker iba film yangluogo aser film ya Japan nung bullet train ka nung nisung tepseter pungo ajurutepa

aser parnok nem lemzüktsüba maparen sendaktepa lir ta par pungoi meteta akümba otsü ka alitsü.

Iba Project nung Kelly McCormick, Leitch aser Antoine Fuqua nunger producer ama inyaktsü. Kasa mapang, Ryosuke Saegusa, Yuma Terada, Brent O'Connor aser Kat Samick nunger executive producer ama project nung aniokogo.

Covid-19 wara nungi kümdangshitsü asoshi iba film set shibangba liasü, ta taoba küm December ita Variety sangdong ajanga metetdaksü.

'Bullet Train' ya IMAX aser format tuluba nung sayatsü terenemba lir. Iba film ya 'Sonic the Hedgehog' sequel, Robert Eggers' 'The Northman', nungia maliba Disney film aser Universal film den külemi

mapang ka nung sayatsü.

'Bullet Train' dak alaka, Sony Pictures-i, Kitao Sakurai indang comedy 'Oh Hell No' sayatsü anogo sangdongogo. Iba film ya July 1, 2022 nü theatre nung sayatsü. Theatre tem nung iba film yagi 'Despicable Me' franchise indang tanabuba prequel aser installment pungobuba - 'Minions: The Rise of Gru' den tokteptsü.

Kiphire nung tebutem atema vaccination drive agitsü

Kiphire, Aami/June 17, 2021 (TYO): Father's Day anogomung nungtem nung, June 20, 2021 nü (Deobar), District Task Force Committee on Covid-19-i special vaccination drive sentong ka ayongzüktsü terenemba lir.

Iba drive sentong dak sendakba nung, DTF Kiphire-i health centre ajak dang tebutem atema alakteta 'Special Vaccination Camp' ayongzüktsü asoshi mepishiogo. Kasa mapang, parnok (kinungbo/tebu) den kinungtsü aser arishi küm 18 tain chirnurtem aruagi iba vaccine agitsü asoshi mepishir, ta sangdong ka ajanga metetdaksü.



Dimapur Ao Lanur Telongjem kübok Merali nung alir lanurtemi tang tashidak wara agi mokdangba mapang timtemer kibong kar reprangteta teyari agütsütsü renemba noksa nung angur. Tanü parnoki Merali (Kashiram village, Oriental & Viola colony) nung alir kibong kar nem jang aser mask lema agütsüogo. (Dimapur, June 17, 2021)

Tokyo Olympics atema India women's hockey squad sangdongogo



Bengaluru, Aami/June 17, 2021: Aruya Tokyo Olympic Games atema, Brehostibarnü Hockey India ajanga sangdongba 'Indian Women's Hockey Team' nungi asayatem Bengaluru nung külemi tangokba noksa ka yangi angur.

Bengaluru, Aami/June 17, 2021 (Agencies): Taküm Tokyo Olympics, koba July 23, 2021 nungi tenzüka asayatsü sentong lir, iba asayamung atema, Brehostibarnü Hockey India-i züngsem 16 tetsür hockey squad sangdongogo.

India tetsür hockey squad nung züngsem 8 tashi iba Games nung mezüing shilem agiba angutsü aser tanüingba asayar 8 yagi 2016 Rio Olympics nung shilem agiogo. Rio Olympics asayaba mapang, group stage nung India team tsükadok.

2016 Olympics nung shilem agir rongnung Rani Rampal, goalkeeper Savita Punia, Deep Grace Ekka, Sushila Chanu Pukhrabam, Monika, Nikki Pradhan, Navjot Kaur aser Vandana Katariya nung dena lir. Küm 36 nung, India women's hockey team-i iba

asayamung (Rio Olympics) nung mezüing shilem agia liasü. Tokyo 2020 nung India tetsür team-i tasembubaba shilem agir alitsü. 1980 Olympics nung India tetsür hockey team-i mezüing asayaogo.

"Tesüiba küm ishika nungi, iba team-i kanga meranga inyaka aruogo aser asaya tsütsü kanga renlokogo. Iba squad nung asayar tejen aser tasen meyoktepa lir aser aji jangratemsüka. Tokyo asayamung nung onoki team tajungtiba den asayatsü asoshi terenemba lir. Iba team nung asayar ajak dak sempet tajung lir aser aruya aliba Games ajanga asayar tajungtiba adoktsü onoki imlar," ta head coach Sjoerd Marijse-i ashi.

Alima ajunga asüingba Covid-19 wara ajanga, taoba küm nungi Tokyo Olympics

atsülangja arur sülen, taküm July 23 nungi tenzüka August 8, 2021 tashi iba Games asayatsü renema lir.

Iba Games indang tetsür hockey telemsa nung, India team Germany, Great Britain, Ireland, Netherlands aser South Africa den Group A nung dena lir. Tetsür Hockey asayamung tenzüka, July 24, 2021 nü India-i Netherlands den asayatsü.

Tokyo Olympics atema Indian women's squad yamai alitsü:

- * Goalkeeper: Savita
- * Defenders: Deep Grace Ekka, Nikki Pradhan, Gurjit Kaur, Udita
- * Midfielders: Nisha, Neha, Sushila Chanu Pukhrabam, Monika, Navjot Kaur, Salima Tete
- * Forwards: Rani, Navneet Kaur, Lalremsiami, Vandana Katariya, Sharmila Devi

Tokyo Olympics aser Wimbledon 2021 nung Nadal masayatsü

New Delhi, Aami/June 17, 2021 (Agencies): Brehostibarnü, Tennis asayar mongin aser 20-ben Grand Slam takok angusang, Rafael Nadal-i, temang anepalutsü aser tennis wadang atsülangtsü nükjidong nung, aruya aliba Tokyo Games aser Wimbledon 2021 nung shilem magitsü, ta ashi.

2008 aser 2010 küm Nadal-i Wimbledon anaben tashi koka lir aser 2008 Kim tebur kija tennis asaya nung pai Olympic gold medal takok angu.

Rafael Nadal, shiba tan ita tetenzüklen Roland Garros asayamung nung Novak Djokovic-i tsükadoktsü, pai ashiba agi, Roland Garros aser June 28 nungi tenzüksü aliba Wimbledon tsüingda mapang tatsüka ya temang anepalutsü aser asaya atema renemshitsü petakra.

Nadal-i, tanga asayamung nungi alakteta, kü mulung nung Olympic Games teti alitsü aser Olympics 3 tashi nung Spain tenüing nungi shilem agitsü maongka anguba ya konang ama lir, ta ashi.

"Taküm Wimbledon aser Tokyo Olympic Games nung

shilem magitsü ni lemtetogo. Iba telemtetba agitsü temela masuy, saka kü temang jenjang asadanga aser team den sensaksemba sülen, telemtetba shitak agiogo ta angateter," ta Nadal-i ashi.

"Tennis wadang atsülangtsü aser ni pela alitsüsa maparen shitak inyaksü tebilemba lir. Yamaji sentong yanglu nungang, temaba jenjang nung maneni toktep yonga aotsü aser tetoktepba asayamung nung akok tashi pei alizüing tongtettsü aser asaya tsütsü tali rajemtsü," ta pai shisem.

Olympic Games nung shilem agitetba ya maongka tulu aser Saisapongger ka ama iba asayamung ya kanga dang tongtibang. Alima tesem balala nungi saisponger aikati iba asayamung (Olympics) nung shilem agitsü jangraba ni nguogo. Olympics asem tashi nung shilem agitettsüsa nia maongka tajung nguogo aser linük tenüing nungi asayatsü maongka anguba asoshi nümatanga bilemer," ta Nadal-i ashi.

Nadal-i ashiba agi, clay-court season nung kanga belema

asaya liasü aser tangba mapang anisüingzüka temang anepalutsüji tongtibang lir. Arishi küm 35 tain Nadal-i 14buba Roland Garros takok angutsü asoshi meranga asaya, saka semi-final nung pa tsükadok. French Open semi final tashi tongteta asayaba mapang, Nadal-i asaya tasembubaba makok.

Roland Garros aser Wimbledon tsüingda hopta ana dang adoker asünung, clay court season nung belema asayaba sülen, aruya aliba asayamung (Wimbledon) nung shilem agitsü asoshi temang agi menangzüker. Ita ana tashi ni meranga asaya aruogo aser tarutsü asoshi lenla ajunga asadanger sülen iba telemtetba agir," ta Nadal-i ashi.

"Tsütsü asayamung nung temaba jenjang nung asayatsü aser title timba atema tokteptsü mechi, tangba mapang ya saisapong nung khen anena atar, temang anepalubaren tsütsü temulung agütsütsü ji tongtibang," ta Nadal-i shisem.

"United Kingdom aser Japan alakteta, alima tesem ajunga nung fans dang salem den iba osang abener," ta Nadal-isa ashi.

Euro 2020: Round of 16 tongteter team rongnung Italy mezüing kümogo

Rome, Aami/June 17, 2021 (Agencies): Euro 2020 asayamung indang Group A asaya nung, Bodhbarnü Italy-i goal 3-0 agi Switzerland kokogo.

Iba takok ajanga, Roberto Mancini'er telok - Italy, iba asayamung nung 'Round of 16' atema qualify asür teamrongnung parnok mezüing kümogo.

Telok ana tsüingda asaya tenzüker, Manuel Locatelli-i team atema goal ana tashi idaktsü, koba Manuel football career nung iba ya mezüing alitsü. Sassuolo club nung midfielder, Manuel-i iba jenjang nung asayateba atema pai ano sabang tuluba nung shilem agitettsüsa renema aliba sayuogo.

Külem team pur Ciro Immobile-ia asaya atemtsü lia, goal tasembubaba bendenlokja, Italy team-i iba tetoktepba asayamung nung anaben tashi goal 3-0 agi asaya akoker alitsü.

"Parnoki junga asaya tenzüker. Anogo pungo nung asaya tanabuba atonga takok angutsü ya tezüba masü," ta Roberto-i ashi.

1968 küm Italy puri iba asayamung mezüing takok anugba sülen, Mancini'er teloki tanabuba European title takok angutsü temulungtetba tulu nung shilem agidar. Deobarnü, Group A final nung Italy-i asayamung ayonger telok - Wales den

asayatsü terenemba lir.

Italy team-i tesüsa asaya 10 tashi takok anguba nung, parnoki tanga team nem goal ka danga agüja mali. Asaya 10 tashi takok anguba mapang, Italy puri goal 31 tashi idaktsüogo. European Championship finals asayamung nung, asaya ana tashi nung atonga Italy team-i goal 3-0 agi takok anguba ya tan mezüing alitsü.

Kasa asaya nung Switzerland team-i goal ka danga meinoktsüteti iba asaya tembang. Tongti asayar talisa Granit Xhaka aser Xherdan Shaqiri nati team pur atema teimla kecha magütsü. Iba asaya mapang, Swiss team-i goal idaktsütsü maongka khen dang angu.

Tang, Euro 2020 Group A table nung Italy round ana asayaba sülen point trok ngua parnoki Wales (four), Switzerland (one) aser Turkey (zero) ajangeta lir. Deobarnü, final pool game nung Wales den asayaba mapang, Italy draw nung tembangra, iba Group nung parnoki temaba jenjang tongtettsü.

Kasa asayamung, Baku nung Group A nungi Wales aser Turkey asaya liasü. Iba asaya nung Gareth Bale teyari ajanga Wales-i 2-0 agi Turkey akok. Aaron Ramsey aser Connor Roberts nati Wales atema goal ka ka idaktsü.

Hyderabad Cricket Association nungi Azharuddin agienogo



Hyderabad, Aami/June 17, 2021 (Agencies): Hyderabad cricket association Apex Council-i Bodhbarnü taoba mapang cricket asayar Mohammed Azharuddin, Hyderabad Cricket Association (HCA) indang President mapa nungi agienogo. Iba telemtetba agitsü atema ajak bangjemtepa liasü, ta council sangdong ka ajanga metetdaksü.

Taoba mapang India cricket team captain, Azharuddin indang ken o kar metembangi aliba yong, Apex Council-i pa president menden nungi anentsü. Pa mapa nungi agientsüba den külemi, Council-isa pa membership agienadok aser 2019 küm Semptember ita HCA indang President ama shimsang Azharuddin dang show-cause notice ka agütsü.

"Züngsemtem ajanga na anema (Azharuddin)

ashishibatem asadanger sülen, tan ita (June) 10 nü Apex Council senden ka nung nai temzüngtem anema aibelenbatem dak sendakba nung 'show-cause notice' agütsütsü telemtetba agia liasü. Item tashishitsü aketba ken o dak sendakba nung asüingdangyaba maparen matem tashi Apex Council-i HCA indang züngsem nungi na agiena atar," ta showcase notice nung shia lir.

Pai HCA nung president mapa agizükba külen nungi, panel temelaba magii Azharuddin-i pa mulungka agi telemtetba tem agiba dak sendakba nung züngsemtem aiben nemmettepa osang angazüka liasü.

May 25, 2021 nü 10buba apex council senden agiba mapang, Azharuddin dang show cause notice agütsütsü asoshi telemtetba agi. Iba show-case notice nung, Azharuddin ya Dubai nung nija cricket club ka indang mentor ka, koba T10 cricket asayamung nung shilem agir aser iba club ya BCCI ajanga agizüka mali, ta tuteta ashi.

2019 küm September 27 nü Azharuddin ya HCA indang President ama shim, saka pa inyaka aruba mapang pa maparen nung mangatetep aika adokogo.

BILEMDANGANG

"Jenjang makaba purtembo tangari mesapur."